

ጳውሎስ ጥሞትዎሴሃ ከተሶ ሶህኑተ ኣጉስ

ጢሞጥዮሴ ዬኖ አመዕናቹ ዋደልቹ ከለቀንሹስ ቀወሃ እስይ ባዲች እህን አመስ አዲን አይሁድቹለከ እንስ አዲን ግሪክቹሃ እቅ፤ ጳውሎሴ ሆኅ ጃላለከ እንጂል ሆኅ ሶህኖን ሀዕለኖሲሃ እቅ፤ ጳውሎስ ጢሞጥዮሴ ከተሶ ዎኔ ሶህኑተ ስሶ ቡዕላ እኮ ጠዋን እኮእሃን።

ጉዕሚችን ሄጭ ሶህኑስ አመዕናኖ ኣዜን ኬዕዮ ክዝብ ትምህርተ አገዕርታገ እእኖ እቅ፤ ክዝብ ትምህርቱ ደሩስ አይሁዲሃለከ ደሩስንገ ዋሎ መን ጠወ አፎሃ እህን «ኩ ኣዲንያ እሉ ጩቢን በዕዮሃ እኮቤቺሃ ጡሙ ደገሞተ አታለኖ አደ እኮ ሞስጥር ኤንኬዕሪን መት-መቲ እቻቺለከ ቦለቺች አገዕርንት» ዮኖ ጠዋን ኡርዮእሃን እቅ። ቲሁንገ ሶህኑስ ዱእ ሞኒ ገሹሃ፡ መገኑ ኡጩኖ ሴር ትምርተሃ፡ ህትን ዱእ ሞኒ አዋንሳኑትለከ ሀዕልታስሩ ሄኦስተ ሀስስኖ ጠወ አፎእሃን። መጨረሻን ጢሞጥዮስ መሲህ ኢስ ጡመ ካድንቹ ሀት እክ እሆተ አታለኖ ጎር አደደ አመዕናኖ ኣዜን ሆኅ ወጥሃ ጳውሎስ ኣሴ ሸዘነተ ደንጋሞ።

መጻፉስ አፎሃ

ኣጉስ (1፡1-2)

ዱእ ሞንተኔሃለከ ክድመተኔሃ ኣስሞ ትምርት (1፡3—3፡16)

ጢማትዎሴ ክድመተኔሃ ኣስሞስ ትምህርተ (4፡1—6፡21)

¹ ፌሳንቹኔ እኮ መገንለከ ተቢሳሃ እኮ መሲህ ኢስ ትዛዚን መሲህ ኢስ አሳቤቹ እኮም ጳውሎሴች፡-

² አመዕነተን ሀንቅ ቤቱእ እኮ ጢማቶሴሃ ሶሃንቶአተ ሶህኑ፤

አናኔ መገኒችለከ ቀርቹሃኔ መሲህ ኢሲች ኣስቱቲ፡ ማርቱትለከ ወገሬቱሁ ኪን እሁን።

ክዝብ ትምርቲች አገዕርተኔሃ

³ እን መቄዶን ባዱ መርሞ ወክት መቱ-መቱ መኑ ክዝብ ትምህርት ተማርሲታበእገ፡

⁴ ማቀተለከ ዋለኤናን ጎፍበ እለንሸ ዋለንሸበ ፈንቀልታበእገ አዘዘን ኤፌሶን ከተማን አፋዕልቶተ ኤገተክ ያንኬ፤ ህትናሙ

ጠወንኩ ኦደተ ኤበኖ ቤሉ መገን አመዕነቲን ነጽኖተ ደግለለኝበኣ።

5 ከን ትዛዚኛ መሰሰ ጠሊለ ቀልብቺ፥ ጡመ ሰውቲኛለክ ሀንቅ አመዕነቲኛ ደገንታኣተ ኢተ።

6 መት-መቼ መኑንኩ ህትናሞ ጠዊኛ አደ እክ ደግለለኛበኣ ኦደበ ፈንቀልቶኡ።

7 እሰን ሕገ ሮሰሳእራ እኮተ ሀሰን የኖሰርቼ ደጋበኣ፤ ህከረንገ «ደገን ጠወዕናሚት» ይተን ጠወኣኢንከ አጥራመታበኣ።

8 መኑ ሕገ ጡመ እሁሰ ደግለሸቀሞ ጎሬ ጡመ እሁሰ ደንጋሞ።

9 ህትን ሕጉ ኣሰሞሁ ሕገ ድጅታህኡተለክ አዘዘንትበ መኒሃ፥ መገኑ ዮሰበእህኡተለክ ጨበኛኖተ፥ ጠሊልመት ዮሰበእህኡተለክ አመዕነት ጠወ ግባህኡተ፥ አኖተለክ አማኖተ፥ ሸታህኡታትለክ ነቢሳሃ ቤሳህኡተ

10 ዝነተ አታህኡተለክ ለቦሁ ለቤን ዝነተ አታህኡተ፥ መነ ነገዳህኡተለክ ክዘባህኡተ፥ ክዘቢን ጤሌዕሊታህኡተለክ ሀንቅ ትምህርቲን ሀንበዕለመኖ ጠወ ጉዕመንከ አታህኡታት፤ ጡመ ሴሪን ኦደንታ መኒሃት ቤሉ ጡመ መኒሃበኣ።

11 ኩንን ሀንቅ ትምህርቱ ደገመኖሁ ገለትጨሞ መገን አዲኛ ዲዱብሰኖ ከበጀሞ እንጂሊቺት፤ ኩ እንጂሉ ኤሳሃ ኤገተ ኣሰሞኤሃን።

ጳውሎስ መገኑ ገለትጨሰ

12 ኤሳሃ ሆጎሃሰ ካዲንቹ መጠር አመዕነሞሚሃ አዕይ ዋለዕዮኤሁለክ ዋልቀተ ኣሴኤ ቀርቹኔ መሲህ ኢሰ ገለትጨሞ።

13 እንን ከኒኛ ብርተ ሸራሚሃ፥ መሲህ ኢሰ ቦሮሮሚሃለክ ሆፍሾሚሃ እኮሞጎሬሁ ህካን ጉዕመንከ አዕዮሚሁ ደጉ ሆጊንለክ አመዕኑ ሆጊን እኮቤቺሃ ማርቱተ ደኤም።

14 ህትን መሲህ ኢሲን ደገመኖ አመዕነቲንለክ ኢታን ሜጡበ ቀርቹኔ ኣሰቱት በተኣ ኣሰንቶኤ።

15 «ጨበኛኑተ ፌሶተ መሲህ ኢሰ ከ ኣዱንያ አል አሜኛ» ይታ ላገት ሀንቅያለክ መኑ ጉዕመንኩ ኣኡ ሀሰሰኖሃን፤ እንን ጨበኛኖኛ ጉዕሚኛን ዋዕኔሰሃን።

16 ጠወ እኮጎሬ መገኒኛ ማርቱተ ደኤም፤ ማርቱተ ደኤሚሁ መሲህ ኢሰ ዳንጉ ዮበኢሃ አታዕሉሰ ጉዕሚኛን ባሾሞ ጨበኛ እኮሞ ኢ አሌን ለሊሽ እሲን አመዕነታህኡተ ዘላለሚሃ ሄኡ ደእታህኡተ ሞሳልተ እሆታት።

17 ህካን እኮቤቼሃ ዘላለሚሃ ዎመ እክ ሬሀኖበእለክ ለለኖበእ ሚጣሃ መገኒሃ ሎርመትለክ ከበጁ ዘላለሚሃ እሁንሰ፤ ኣሚዕን!

18 ኢ ቤቶ ጠዋቲዎሴ! ዎዕናንከ ኪተኔሃ ኩለሞ ራግገን ጡመ ኣለንሽ ኣለንቶተ፡

19 ኣመዕነቱሁ ጡሙ ቀልቡሁ ሄኣሄተ ከ ትዛዝ ኤገተ ኣሳንኬት፤ መሰንትሰ መት-መቱ መኑ መርከበ ሸረኖሁ ዮበእ ጎሬ በኣኖህንገን ቀልብ ሆጊን ኣመዕነቱሰ ቤሶኡ።

20 እሰ በላንን ሄሚኖሰለክ እሰክንድር ደገንታኣ፤ እሰን መገን ኣሌን ቦርር ላገተ ጠወኢቶ ተማርቶተ ሼይጣኒሃ እን ህገሽ ኣሰዮንሰረ።

2

መገን ሞኔን ዱኣ እእተኔሃለክ ሴርተኔሃ

1 መኑ ጉዕሙንኩ መገን አደ ኡጭቱተ፡ ዱኣሃ፡ ዎሎ መኒሃ ዱኣ እኡለክ ገለትጩሁ መኑ ጉዕሙንኩ እኦተ ሸዛሞ።

2 መገኑ ዋጂን ጡመ ሃሊን አዎንን ወገሬቲንለክ ጨለዪን ሄዕኖተ በትሽን ዎማተለክ አበ ሆጎ ኣሌን ዮሀኑኡተ ዱኣ አዕዬ።

3 ሁኩንን ፈሳንቼሃኔ መገን ብሬን ጡማለክ ተሸ ዩኖሃ ጠወ።

4 መገን ሃሸኣቱት መኑ ጉዕሙንኩ ጡሞተለክ ህንቅ ደጋጋት።

5 መገኑ ሚጥቼሃን፤ ህትን መገንለክ መን በላን እኮ መቱ መንቹ ዮኡ፤ እሰን መንቹ እኮ መሲህ ኢሳት።

6 እሰን መን ጉዕመንከ ዎዞተ ገዉሰ ዎዝኑተ አዕይ ኣሴእ፤ ሁኩንን መገኑ መን ጡሞሶተ ሀሾገ ሀሰሰኖ ወክቴን ሀሴማእሃ ሞሰክር።

7 እን አይሁደ እህበ መኒሃ ኣመዕነቱለክ ህንቅ ተማርሶተ ዱዱብሳንቹለክ ኣሳቤቹ እክ ሾመሞም፤ ህካን ያም ወክት ህንቅ ጠወኣሚት ቤሉ ክዘርሞበኣ።

8 ቴሱ ጎኑ ቤቾን ጉዕማንን ኡሙዕርተለክ ብተት ዮበኢሃ ጠሊለተ አንገተ አሌ ኬሰ ዱኣ አቶተ ሀሳም።

9 ህትን ሜንቱ ሙሞሰ ደደን ህከረንገ ወርቂን፡ ናሲን ህከረንገ ጤኣተ እኮ ኦድኑተ ሹልሞሰን እሁዕናን ማሌን ጡሞማን ሀሰሰኖጊን ጡመተ ኦድኑተ ኦድኡን፤

10 መገኒሃ ሰገንዳሚት ይታ ሜንቱ ኣኡ ሀሰሰኖሰገ ጡመ ሆጉተ ኣቱን።

11 ህትን መንቹት ጉዕመ ጠዋን ኣዘዘሚን ሎድት ተማርቱን።

12 ህትን መንቹት ጨለ ይቱን ቤሉ ተማርሰቶተ ህትን ጎን አሌን ሹመ እኩን ያምበኦ።

13 መሰንትሰ ሄጭ ከለቀሞሁ ኣደማት፤ ህከኒች ኤተሮን ሐዋ ከለቀንቶኡ።

14 ህትን ጣንሰንት መገን ሕገ ድጅቶኢት ሐዋት ቤሉ ኣደም ጣንሰሞበኦ።

15 ጠው እኮጎሬ መንቹት አመዕነቲኒ፤ ኢታኒ፤ ጠሊልማንለከ ገው አገዕርን ሄኑ ጎሬ እለተ እሊን ጡምታኦ።

3

አመዕናኖ አዎንሳኖተኔሃ

1 «አዪሁ አመዕናኖ አዎንሳንቹ እሆተ ሀሾ ጎር ሎረ ሆጉተ ሃሽአኖት» ይታ ላገት ሀንቅሃን።

2 አመዕናኖ አዎንሳንቹንኩ ኩሌኖስ ጠዉ ዮሰበኢሃ፡ መቲ መንቹተ ምኒ እነ እኮሃ፡ ጌሲን ሄአኖሃ፡ ገወሰ አገዕረኖሃ፡ ኬዕምኣስ አገዕረኖሃ፡ ኮሀ ቶገኖሃ፡ ተማርሲሃ አታለኖሃ፡

3 ሰከሪባሃ፡ ኡሙዕሪባሃ፡ ጎደበ ላፈ፡ ብተምባሃ፡ ብረ ኢትባሃ፡

4 ገይሰ ምኒ አበርሱ ጡመገ ገሾተ አታለኖሃ፡ እለሰ አዘዘንታሲሃ፡ ጉዕመንከ አዲን ኬዕምሳሲሃ እሁ ሀሰሰኖሰ።

5 መሰንትሰ መቱ መንቹ ምንሰ ገሾተ አታልባች መገኑ አመዕኔ መነ ገሾተ ሀት አታለኖ?

6 ህትን እልቢሰ አሌን ፈረደሞገን ቦኣያን አሌሰ ፈረደመኖበእገ ሃዕሮ አመዕኔ መንቹ አዎንሳንቹ እሁንከ።

7 ህትን ሆፍኚንለከ ሻይጣን ዎሻድን ኣገኖበእገ አመዕንበ መንቤችን ገለትጨሞኢሃ እሁ ሀሰሰኖሰ።

ድያቆናከተኔሃ

8 ህትን ድያቆናከተ * ኬዕምኡ ሀሰሰኖሰረ፡ ለሙ ጠወኣበእረ፡ ዎይን ጠጂን ሰከርታበእረ፡ ብሪሃ ጎራይትበረ እሁ ሀሰሰኖሰ።

9 ህትን አመዕነቲን ለሌ ሀንቅ ነጠ ቀልቢን ጠረኣስ አፋ ሀሰሰኖሰ።

10 አሰንተ ሄጨን ፊተኔን ለኡ ሀሰሰኖ፤ ህከኒች ኤተሮን ኩሌኖስ ጠዉ ዮበእራ እኮኢች ዲያቆን እኮተ አታልታኦ።

2:13 ክል. 2፡7፤ 21፡22። 2:14 ክል. 3፡1-6። 3:7 ቲቶ 1፡6-9። * 3:8 ድያቆናከ ሆጉት፡- አመዕናኖተ አዎንሰታ ባልቀተ ሀዕልታአራን።

11 ህትን ምንስ አማኑት ኬዕምሴኖስረ፤ ሄዕምታበአረ፤ ገዉስ አገዕርታአረለከ ጉዕመርቸንን አመዕነንቶአራ እሁ ሀሰሰኖስ።

12 ህትን ዲያቆነት መቲ መንቸ ምኒ አነ እኮረ፤ ኦሱሰለከ አበሮሱስ ጡመገ ገሸታአረ እሁ ሀሰሰኖስ።

13 መሰንትስ ዲያቆነት ጡመገ ሆጉተ አታአሩ ገይሀስ አበ ኬዕምኝ ደአታአ፤ ህትን መሲህ ኢሲን ዮስ አመዕነትተኔ ልግብ መለሉ ደአታአ።

ማጠሞ ሎረ ምስጥርተኔሃ

14-15 ፎሊን ሄአኖ ዱእ ምኒ በላን መቲ መንቹ ሀት እክ ሄኡ ሀሰሰኖስ ጎሬ ሀት እክ ፈንቀላመኖ ጎር ደጋገ ከተቦንኬ፤ ሁኩ መገን ምኑንኩ ሀንቅ ቱቃለከ ቀበበ።

16 አመዕነትኔ ማጠሞ ጠዉ ሸክሲሰበ ሎረሃን፤ እስን መንቹ እክ ለልዮአሃ፤

ሀንቅ እሁስ ጠሊለ አያኒን አዋጀሞአሃ፤

መላይካተ ለልዮአሃ፤

መኒሃ ጉዕሚንከ ዱዱብሰሞአሃ፤

ከን ኣዲንያ አል መኑ አመዕንዮስሃ፤

ኬዕምኒን ሰማሃ ኦርዕዮአሃ።

4

ክዝብ አስተማረተ

1 ጠሊሉ አያኑ ለሊሽ «ኤተር ዘማኔን መት-መቱ መኑ ሉሲሰኖ ሂላ አያነለከ ሩሃንይ ትምርት አዎንተን አመዕነቲቹ አደ እክ ቄዕርታአ» ዮኖ።

2 ሁኩ ትምርቱ አሜተኖሁ አታኢሁ ሀንቅ እሁሰለከ ሀንቅ እሁ ሆጉስ ደገንን አመሰልታ ክዝበኛኖችት።

3 እሰን ኤበቀንሽ ከንታአ፤ አመዕንታለከ ሀንቅ ደጋ መኑ እሱ ገለትጭተን እታገ መገኑ ከለቆስ እቸተ «እቶኖቹ» ይት ከንታአ።

4 ጠዉ እኮጎሬ መገን ክልቀቱ ጉዕሙንኩ ጡመ እኮቤቺሃ ገለትጩን ቶጌመጎሬ ኡጂኖሁ መቱሁ ዮበአ።

5 መሰንትስ ሁኩን መገን ላጋንለከ ዱእ አኢን ጠሊለ እሀኖ።

መሲህ ኢስ ጡመ ካድንቹ እህተኔሃ

6 ከ ትምህርት አመዕኖተ ኣቶንትጎር አመዕነት ላገተለከ አዎንቶንት ጡመ ትምርተሃ እት ነጽቶንት ጡመ መሲህ ኢስ ካድንቹ እካንት።

7 ህትን ከን ኣዲንያ አሊች ደግለሊበ ጠዊችለክ ዲንዩ አል ማቁተ አጉደኖ ጠዊች ሁን፤ ገዉክ መገን ጠዊሃ ርሰሰ።

8 መሰንትሰ ገዉ ጠረኝሰኖ ጠወ ርሰሱ ቀዉ ደግለለኖ፤ እኩጎሬ ገዉ መገን ጠዊ ርሰሱ ከን ሄኢሃለክ አሜተኖ ሄኢሃ ተቢሶሁ ዮሰቤቹሃ ጉዕመ ጠዊንክ ደግለለኖ።

9 ህካን ዩ መኑ ጉዕመንኩ ሹል ቶጉ ሀሰሰኖሰ አመዕነሞሃ ጠወ።

10 ነኡን መነ ጉዕመንክ አደንክ አመዕነታሁኡተ ጡምሰኖለክ ሄኦኖ መገኖን ተቢሳሃ አዕናምቤቹሃ ሆጎን ሆንጋሚሁለክ አጸማሚሁ * ከ ጠወ ደኢሃት።

11 አት ከ ጠወ አዘዝለክ ተማርሰ።

12 ህትን ጠወኡንት ጠዊን፥ ሃለን፥ ኢታን፥ አመዕነቲንለክ ሙጨርማን አመዕናኖተ ምሳልተ እህ ቤሉ አዪሁ ኦሰመክ ህንቁንከ።

13 ህትን አን አሜቶተ እለሬተ ጠልለ መጻፈ መኒሃ አነበቡ፥ ዲዲብሱለክ ተማርሱ ጠረኝ።

14 ህትን ባልቀት አሌንከክ አንገሰ አታን ራጉ ጠወአሞሄ ወክት አሰሞሄ ኪን ዮ አሰቱት ህንቆት።

15 ነጹክ መኑ ጉዕመንኩ ደጎተ ወክትክ ጉዕመንክ ከን ጠዊሃ አእ፤ ከ ጠወ ሆጎ አሌን ሆሲሰ ገዉክ እሲሃ አሰ።

16 ገይሃክለክ ተማርሰታንት ትምርተክ አገዕር፤ ከ ጠወ አተን ጠረኝ፤ ህካን አቶንትጎር ገዉክለክ ኪች ሞጮጨኖ መነሃ ጡምሳንት።

5

መኒሃ ኣሰንቶ ሸዘነተ

1 ባሊቆ መንቹ አንክገ ሆንጠህ ቤሉ ሻቆት፤ ህትን ዎደልቹ አመክ ኦሱተ ጠውሲሳንትገ ጠውሲሰ

2 ባሊቆ ሜንቱ አማኖገ ሀርድ ሜንቱ አመክ ኦሶገ አት ዊመ ሙጨርማን ለእ።

3 ህንቅንክ ምንሰ አኑ ሬዮ ሜንቱ ሀዕልተን ከበጅሰ።

4 ጠዉ እኩጎሬ ምንሴ አኑ ሬዮ መንቹ እለት ህከረንገ እለ እለት ዮሱጎር ሁኩ እለት ሄጭት ምንሰ መነ ደግለለን ኤዳሰ ፈንቀሽቱን፤ ህከን አመዕነቲን ሆጉተ ተማርቱን፤ መሰንትሰ ሁኩን መገኑ ሙንዲሲሰኖሃ ጠወ።

* 4:10 አጸማም፡- ዩኖሁ መት-መቱ ኪታበት ቦረረማሚት ይታኡ።

5 ምንሴ እኑ ሬዮ ሀንቅ ህዬሸት ሜጢሃሴ ሄኣ መንቹት መገኖን ተቢሳሃ አታቤቹሃ ሀንከዕርተለከ በራሃ መገኑ ጠዕሚንለከ ዱኣ አተን ጠረኝት ሄኣኣ።

6 ጠለዕል ከን ዱንያ አል መኩተ ሀሳ ምንሴ እኑ ሬዮ መንቹት ነቢሴን ሄኣ ጎሬ ሬቶአታን።

7 እሰን ቀነጤኖሰርቹ ዮበእረ እኩተ ከ ትምርተ አሰ።

8 ህካን እኮቤቹሃ እሊሃሰ አደደንከ ምንሰ መኒሃ ሰውዮኖበእ መንቹ አዴሁ አመዕነቱሰ ካጆአሃን፤ ህትን ሁኩ መንቹ አመዕንዮበእ መንቹች ባሰ ሂላን።

9 ዋዕነሃ መቶ መንቹን ገልት እለንቶች ሌሃዉ ዘማን ዊምበሴ ምንሴ እኑ ሬዮ መንቹት ምንሰ እኑ ሬዮሀኑኡ መዝገባን ከተበንቱንከ።

10 ህትን እለተ ነሲን፥ ኮሀ ቶጊን፥ አመዕኖ ሎከተ ኣንሺን፥ ኦርጨዋ መነ ሀዕለን፥ ጡመ ሆጉተ ጉዕመንተ አኢን ጡመ ሆጎንከሴ ገለትጨንቶአተ እሁ ሀሰሰኖሴ።

11 ጠዉ እኮጎሬ ምንሰ እኑ ሬዮ ሀርድ ሜንቱ ምንሰ እኑ ሬዮ ሜንት መዝገባን ከተቦት፤ መሰንትሰ እሰ ማል ሄዕላቶት ቄልትዮንሰ መሲህ ኢሳን ዮሰ ኢተት በአን ጎኖን ገልቶተ ሀሳኢት።

12 ኩ ሜንቱ ዋዕነሃ ይቶ ላገተ ድጅቶቤቹሃ አሌንከሰ ፍርደ ኤባኣ።

13 ህከኒችን አበንከ ሆጉተ ገፈሩለከ ምኒች ምኒ ዘሁ ርሳኣ፤ ህትን ሆጉተ ገፈሩ እሁዕናን ሄዕምታአረለከ መን ጠዋን ኣገን ጠወኡ ገበአበሳሃ ጠወኣራ እካኣ።

14 ህካን እኮቤቹሃ አን ምንሰ እኑ ሬዮ ሀርዴ ሜንቱ ገልቶተ፥ እለተ እልቶተ፥ ምንሰ ጡመገ ገሸቶተ ሸዛም፤ ህት አኣን ዲኑኔ ቦሮረኖ ጠወ ሆገኖ።

15 መሰንትሰ ከኒች ዋዕነሃ ምንሰ እኑ ሬዮ መት-መቱ ሜንቱ ሻይጣነ አዋንተን አመዕነት ዋቄች ፋልቶኡ።

16 መቱ አመዕናንቸ መንቹ ምኔን ምንሰ እኑ ሬዮ ሜንቱ ሄኣጎር አመዕኖ ማበራሃ ኬዕመኖበእገ እሴ ሀዕልቱንሰ፤ ከን ሃለን አመዕኖ ማበሩንኩ ሀዕለኖሳሁ ዮበእ ምንሰ እኑ ሬዮ ሜንቱሃ ሀዕለኖ።

17 አመዕኖ ማበረ ጡመገ ገሸታ ባሊቀት ዱዱብሲንለከ ተማርሲን ጠረኝት አታሀኑኡተ ለሙ አፎሁ ኬዕምኙ ሀሰሰኖሰ።

18 መሰንትሰ ጠሊሉ መጻፉ «ውጠተ ዋቀርተን ቦር እፎ ኡሱርቶት» ህትን «ሆጉተ አኣኖሀኒሃ ደምኩ ሀሰሰኖሰ» የመሞኡ።

19 ለሙ ህክረንገ ሰሱ መንቹ መሰከርትባች አመዕናኖ ማበር ባለቅ አሌን ሆንጠህሴኖ ኦደተ ቶጎት።

20 ህትን ዎሉ መኑ ዋጅታገ ጨብ አታ መነ ጉዕመንከ መን ብሬን ኡሙዕር።

21 ህትን መነ አደ አኡ ዮበኢሃ መቱ-መቲች በትሱዕናን ከ ኩሌመሄ ጠወ አገርቶት መገን ብሬንለከ መሲህ ኢሰ ብሬን መጠረንቶ መላይከ ብሬን ኤገተክ ያንኬ።

22 ህትን አንገክ አዩ አሌኒ ደዕልት አቶት፤ ዎሉ መን ጨብ ቤቀንቶት፤ ገዉክ ሙጨሩ አት አገዕር።

23 ልግብ ወክት ጎደበክ ጥዘኖሄቤቺሃለከ ጥዘነት ዮሄቤቺሃ ቀዉንከ ወይን ጠጀ አግ ቤሉ ከ ኤተሩ ጠለዕል ዋሃ አጎት።

24 መት-መቶ መን ጨቡ አገንቹ እክ ለለኖ፤ ሁኩንን ፍርድበ ኢልሰኖ፤ ህትን ዎሉ መን ጨቡ ዲንክ ለለኖ።

25 ህትን ጡመት ሆጉት ኑሪ እክ ለልታአ፤ ኑሪ እክ ለልትበጎሬ ማጠንቶገ ሄአበአ።

6

ሮሳተ ኣሰንቶ ሸዘነተ

1 መገን ሱዕሙለከ ትምርቱ ቦርረመኖበአገ ሮሶመ ኣዜን ሄኦሩ ጉዕሙንኩ ቀርቻኖተሰ ዊሙ ኬዕምኙ ሀሰሰኖሰገ ደጉን።

2 ህትን አመዕናኖ ቀርቻኑት ዮሰ ሮሰት ቀርቾ መሲህ ኢሲን አመኦሱተ እኮቤቺሃ ቀርቻኑሰ ኬዕምሰበረ እሁ ሀሰሰኖሰበአ፤ ህከን ወጢ ጡመ ሆጎንከሰ ሀዕልታእረ አመዕናኑተለከ ኢተንቶእረ እኮቤቺሃ ዎዕኔች አበ አኡ ሀሰሰኖሰ፤ ከ ጠወንከ ተማርሰተን ሸዝ።

ክዝብ ትምርተለከ ሀንቅ ቀባጦተኔሃ

3 አዪሁ ቀርቹሃን መሲህ ኢሰ ላጋንለከ መገኑ አጉዲን ትምርታን ሀንበዕለመን ዎሉ ትምርተ ተማርሴጎሬ

4 ሁኩ መንቹ ቦኒን ቡሰምሃ ቤሉ መቱርቹሃ ደግበሃን፤ ጠዉ እኮጎሬ ወገሬቱ ዮበእ ሄዕላቸት አፎሰ፤ ሁኩንን ኤበኖሁ ምቀኝመተ፤ ብተተ፤ ቦርዕረንሸለከ ሂለ ሸክተ

5 ቀልቡሰ በዕዮለከ ሀንቂች ፋልቶ መን በላን እኮ ተንቅታበእ ኦደተ ኤበኖሃን፤ እሳንከ መገኑ አመዕኑ ዲንያተ ደኤኖ ዎቃሃ አጉጃሰረን።

6 ጠዉ እኮጎሬ «ዮኤሁ እሀኖኤ» ዮኖ መንቹሃ መገኑ አጉጅ ሄኡ ትርፈ ደግሲሰኖ፤ አመዕነቶን ሀንቅንከ ልግቡ ትርፋ ዮሰሃን።

7 መስንትሱ ነኡ ከን ኣዲንያ አል አሜንቶሚሁ መቱርቹሃ እንፋዕናንት፤ ህትን ከን ኣዲንያ አሊቶ መቱርቹሃ እንፍ መርኖተ አታልናምበኡ።

8 ጠዉ እኮጎሬ እንታሚሁለከ ኦደዕናሚሁ ሄዕዮኔቶ ሁኩን እህኖኔ።

9 ህትን ቀባጣሙ እህሃ ሀሳ መኑ ፊተናን፥ ዎሻዶንለከ መኒ በኡ ኤበኖ ገውሰናለከ ምዕረኖ ልግቤ ሄዕላቶን ኡባኡ።

10 መስንትሱ ብረ አቱ ልግቤ ሂልማተ ጉዕሚንከ ጠጸን፤ መት-መቱ መኑንኩ ብረ ደኢሃ አበ ሄዕላቶቤቹሃ አመዕነቲቶ ኡቦኡ፤ ልግቤ ሻዞን ቀልቡሱ ቢጠመኖገ አቶኡ።

ጳውሎስ ጥማቶሴሃ ኣሴ ሸዘነተለከ ትዛዝተኔሃ

11 ጠዉ እኮጎሬ አት መገን መንቶ! ከን ጉዕማንከ ጠዊቶ ሁን፤ ፈይመተ፥ መገን ጠወሃ፥ አመዕነቱሃ፥ አተታ፥ አታዕሉለከ ጎደበ ላፍመተ አኡሃን።

12 ጡመ አመዕነት ኦለንሽ ኦለም፤ ዘማን ጉዕሚንከ ሄኡ አፍ፤ ህከ ዘላለም ጉዕሚንከ ሄኢሃ ገኣንት ልግብያ ምስክር ብሬን ጡመ ምስክርነቱ መስከርቶንት።

13 ህትን ጉዕመርቹንከ ሄኡ ኣሰኖ መገንለከ ጴንጤናዊቶሃ ጽላጦሴ ብሬን ጡመ ምስክር መስከር መሲህ ኢሰ ብሬን

14 ቀርቹኔ መሲህ ኢሰ ፈንቀል አሜቶተ እለ ከ ትዛዝ ሉጨንሹለከ ህንቄኖስ ጠዉ ዮበእገ እክ አገርቶተ አዘዛንኬ።

15 መሲህ ኢሰ አሜቱ ማስአሞለከ ሜጥሃሰ ገሻንቹ እኮ ዎመ ዎመለከ ቀርቻኖ ቀርቹ መገኑ ለልሾ በሬን እህኖ።

16 ህትን ጠለዕሉ እሰ ሬሀኖበእሃን፤ አዪሁ ሆንጠሆተ አታለኖበእ ኑሬን ሄኢኖሃን፤ እሱንከ አዪሁ ለዕይ ከሰበኢ፤ ህትን አዪሁ ለኦስተ አታለኖበኢ፤ እሱንከ ኬዕምጽለከ ዎልቀት ዘላለሚሃ እኩንሰ፤ ኣሚዕን!

17 ነኡ ሙንደዕናተ ጉዕመንከ በትሽ ኣሰኖ መገን ቤሉ ከን ኣዲንያ አሌን ዮ ቀባጣመት ቦንታበእገ ህከረንገ አመንሰሾበእ ቀባጦን ተቢሳሃ አታበእገ አዘዝሰ።

18 ህትን ጡመተ ሆጉተ አቶተ፥ ጡመ ሆጎን ቀባጣመተ እኮተ፥ መኒሃ ሀዕሊሃ ዮሳሃ ቤኮተ ተቃጠባገ አዘዝሰ።

19 ህትንን ሀንቅ ሄኡ ደእቶተ ቀበቡሱ ጠረኻ እኮ ቀባጡተ አሜተኖ ዘማኒሃ ገይሃሰ ጭምአታኡ።

20 ጥማቶሴ! ኣሰንቶሄ ኤገተ አገር፤ ህትን ገገይንከሰ ሀንበእለንሺን ኤንኬዕኒን እሁዕነ መኑ ክዘብን «ኤንኬዕነኑሃን» ይት ገእታ ኤንኬዕኒቶለክ ደግለለኖበእ ኣዱንያ አል ጠዊቶ ሁን።

21 መት-መቱ መኑ «ህትኔ ኤንኬዕኑ ዮኔ» ይተን አመዕነት ዎቃሃ ሉሶኡ፤ መገን ኣሰቱት ክዕኔን እኩን!

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d